

ex diversis regionibus, à Syria, Mesopotamia, Moab & Ammon, toto æstatis tempore illic nundinas facientes, regionis amœnitate illecti. A civitate *Corozaim* versus orientem quatuor sunt leucæ ad civitatem *Cedar*, in alto monte sitam, quam Josephus *Camelam* vocat, eò quod mons ille *Cameli* formam præ se fert. Hic notabis, totam illam terram, quæ est ultra Jordanem, in littore ejus orientali, vocari *Trachonitidis regionem*, & *planitiem Libani*, & *Bosram*, usque ad montem Libani: littus verò occidentale appellatur *Galilæa gentium*, *Ituræa*, *Zabul*, *Decapolis*, & *Via maris*. In *Trachonitide* est terra *Huff*, quæ beati Job principatus olim fuit.

Huff.

C A P. V.

Iter ab Acone versus orientem.

AB Acone quinque sunt leucæ ad *Vallem fortem Afer*, quæ tenditur usque ad mare Galilææ. Hinc tres sunt leucæ ad *Nason*, villam *Nephtalim*, de qua in *Tobia*. Hinc tres sunt leucæ ad *Dotaim* castrum sub monte *Bethuliæ*, ubi Joseph erravit quum quæreret fratres suos, Gen. xxxvii: 17. Hinc tres sunt leucæ ad civitatem *Nephtalim*, quæ nunc *Suziz* vocatur, unde *Tobias* fuit. Hinc tres leucæ sunt ad *Bethsaidam*, patriam *Andrææ* & *Petri*. Hinc iterum tres leucæ numerantur ad *Magdalum* castrum *Mariæ Magdalænæ*. Inde venit ad terram *Gerasenorum*, in qua multæ sunt civitates & oppidula, ubi etiam mons *Hermon* in dimidia tribu *Manasse* in altum erigitur. Castrum seu oppidum *Dotaim*, situm sub monte *Bethuliæ*, est admodum amœnum; nam habet circumjacentes vineas, oliveta & ficeta, abundatque pascuis pinguibus: ubi & usque in hodiernum diem ostenditur *cisterna* (si incolis fides sit habenda) in quam Joseph missus fuit. Per hunc locum transit iter à Syria in *Ægyptum*, juxta montes *Bethuliæ* per campum *Esdrelon*, procedens sub monte *Thabor* ad sinistram, & inde per campum *Magedo* ascendit in montem *Ephraim*, transiens per *Ramatba Sophim*, & tandem ducens in *Ægyptum*. A *Nason* tribus leucis ad orientem, & à *Dotaim* tribus leucis ad Aquilonem est civitas *Nephtalim*, de qua fuit *Tobias*, quæ tempore excidii Hierosolymitani *Jonapa* creditur vocata. A *Nephtalim* tres sunt leucæ ad *Bethsaidam*, in angulo maris Galilææ, habetque hodiè vix sex domos. Hinc ad tres leucas contra meridiem est *Magdalum castrum*, situm in littore maris, distans à *Bethania* tribus leucis contra Vulturum. Sunt in hac plaga ultra mare Galilææ plurima castella & civitates, nempe *Suetha*, *Theman*, à qua *Eliphaz Themanites*, *Gerefa*, à qua terra *Gerasenorum*, quæ in littore maris Galilææ, sub monte *Seir*, contra *Tyberiadem* est sita, licet paululum declinet ad Aquilonem. Est autem tota illa terra ultra mare Galilææ montuosa, eratque olim de regno regis *Basan*, continens montem *Seir*: nam & *Seir* & *Hermon* inter illa montana comprehenduntur, cessitque hæc terra dimidiæ tribui *Manasse*. Hodiè verò *Saraceni* eam inhabitant. Est & alius mons *Seir* juxta disertum maris rubri *Pharan*, ubi *Codorlaomor* & alii reges cum eo percusserunt *Choræos*, qui habitabant in monte *Seir*, Gen. xiv. 6. quem *Esau* & posterij ejus inhabitaverunt, Gen. xxxvi: 8, 9. Sunt tamen qui dicunt *Esavum* utrumque inhabitasse montem, & utrique nomen dedisse. Nam quum *Jacob* proficisceretur in *Mesopotamiam*, *Esau* habitabat cum patre suo in *Bersabee*, & assumptis omnibus suis secessit ultra Jordanem, quod hinc patet, quia dicitur Gen. xxxiii. 1. Quum *Jacob* transisset *Phannël*, ortus est ei sol, & elevans oculos vidit venientem *Esavum*. Ostenditur autem hodiè locus *Phannël* ultra Jordanem ad orientalem plagam. Quod si *Esau* tunc alterum montem *Seir* inhabitasset, non tam subito occurrere potuisset fratri suo *Jacobo*, quum mons ille à loco *Phannël* plurimum distet, quippe qui tribus diætiis à mari mortuo in ulterioribus locis abest. Proinde hæc locorum mutatio videtur illum consequuta propter diversas uxores, quas passim ex alienigenis gentibus duxit. Nam quum filiam *Ismaëlis*, sororem *Nabaioth*, accepisset, cœpit habitare in monte *Seir*, qui est juxta desertum *Pharan*, in confinio illo, ubi focer ejus *Ismaël* habitavit, de quo in *Genesi* Cap. xxi: 20, 21. dicitur; Factus est vir gnarus *Ismaëlis*.

Dotaim.

Nephtalim.

Bethsaidam.

Magdalum.

Mons Seir.

Phannël.